



□
JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Press Release
04 Abril 2007

**Treinamentu Konaba Investigasaun Kriminal Hare husi Perspektiva Generu
Tuir Kódigu Prosesu Penal Timor Leste**

Programa treinamentu konjunta ne'ebe halao husi Victim Support Service (VSS) no Women's Justice Unit (WJU) husi JSMP durante ne'e iha Distritus balu hanesan; Distritu Liquiça, Aileu, no ikus mai halao tan iha loron 29 no 30 Marsu 2007 iha Distritu Manatuto. Treinamentu hirak ne'e realiza ho susesu tanba koordinasau no kolaborasau diak entre VSS, WJU no Komandante Polisia Distrital sira ne'ebe temi ona.

Objektivu husi treinamentu ida ne'e atu fo koñesimentu konaba oinsa atu halo *investigasaun ne'ebe sensitivu ba kazu Violensia bazeia ba Generu; hanesan Violensia Doméstika no Violensial seksual, alén de ne'e, atu fó koñesimentu kon ba Kódigu Prosesu Penal Timor Leste nian*. Treinamentu ne'e fokus liu ba tipu kazu rua ne'e tamba iha realidade maioria akontese iha comunidade nia leet feto maka sempre sai vitima. Maibe realidade ida ne'e la hetan inisiativa no resposta ne'ebé diak hosi comunidade atu lori kazu ne'e liu hosi prosesu justisa formal. Iha parte seluk, Instituisaun Polisia liu-liu Vulnerable Person Unit (VPU) laduun iha meius, koñesimentu no sensibilidade atu atende kazu violensia bazeia ba Generu, atu nune'e bele proteze no garante direitu vitima nian tuir lei.

Refere ba objektivu treinamentu ne'ebé mensiona iha leten, partisipante ba treinamentu ida ne'e fo prioridade liu ba Agente Polisia sira iha Distritu no Sub-Distritu, liu-liu husi Unidade Investigasaun Kriminal nian no Unidade Vulnerable Person Unit (VPU). Treinamentu ne'ebé foin realiza iha Distritu Manatuto hetan partisipante hamutuk ema na'in tolu nulu resin lima (35) ne'ebé ho antusiasmu tebes hodi tuir treinamentu ne'e durante loron rua nia laran.

Molok hahú treinamentu, iha sesaun abertura nian, Komandante Polisia Distritu Manatuto hato'o katak nia sente kontente no haksolok ba treinamentu ne'e no hein katak liu husi treinamentu ne'e bele hetan informasaun no hasa'e tan koñesimentu Agente Polisia sira nian ba topikun treinamentu ne'ebé hato'o husi fasilitador sira. Ho nune'e, espera katak Agente sira sei fo atendentu diak ba comunidade kona ba kazu Violensia Doméstika no Violensia Seksual.

Durante treinamentu loron rua ne'e, ekipa fasilitador JSMP haree katak partisipante sira kompriende materia ne'ebe fasilitador sira hato'o ba sira no mós sira rasik manifesta iha diskusaun grupu nia laran katak sira hetan informasaun foun iha treinamentu ne'e liu-liu ba termus juridiku balu ne'ebe iha Kodigu Prosesu Penal nia laran.

Fasilitador sira sente haksolok tebes tanba durante treinamentu hetan partisipasaun maksimu husi partisipante sira, nune'e iha sesaun enseramentu nian ekipa fasilitador hato'o agradesimentu wain ba Komandante Polisia Distritu Manatuto nian tanba hodi ninia ordem Agente Polisia bele mai participa treinamentu ne'ebé refere. Iha sesaun enseramentu ne'e mós Deputy Komandante Polisia Distrital hodi Komandante Polisia Distrital nia fatin hato'o agradesimentu ba team fasilitador sira, liu-liu ba JSMP ne'ebe maka organiza treinamentu ne'e iha sira nia serbisu fatin.

VSS ho WJU husi JSMP sei iha komitmentu nafatin atu kontinua halao programa treinamentu hanesan ne'e iha futuru atu oinsa bele sensibiliza investigador VPU sira nia perspektiva servisu nian iha parte investigasaun, nune'e bele loke sira nia vizaun investigasaun nian atu nune'e bele konsidera direitu no interese vítima husi krime violensia domestika no violensia seksual hanesan parte integral ida iha sistema justisa formal nian.

Atu hetan informasaun liu tan bele kontaktu:
Dra. Maria Agnes Bere
Kordenador WJU
e-mail: maria@jsmp.minihub.org

Ou Bele kontaktu direktamente ho
Dr. Luis de Oliveira
Kordenador VSS
email: luis@jsmp.minihub.org
Telephone. (+670 390) 3323883